



## 種牙齒

「消毒、麻醉好了，續下來，愛拿手術布仔在您个面項，毋會影響您放氣，請毋使緊張。好，這下開始手術，係有麼个毋鬆爽，請黏時表示一下。」醫生摻牙倉肉割開、掀開來，係完全無感覺。機器在牙槽骨鑽空仔，幼鑽頭、細鑽頭，緊量、緊換，就像人鑽空仔釘桶仔共樣，噠噠噠噠噠、噠噠噠噠噠，嗶，噠拗蠻久！包尾，人工牙根鎖緬，牙倉肉攥起來。「好了，兩禮拜後來拆線。」前前後後戒歸點鐘仔，麼人講一下仔就好？騙人！

好得醫生講，吾牙槽骨還異健，毋使補骨，省一筆錢，算有安慰著兜仔該兩片痠軟个牙鉸。金哲哲个人工牙根，愛亮相幾久？請耐心等待，等人工牙根在牙槽骨生核，盡少愛四、五個月，到該央時，正做得鬥靚靚个假牙齒。

牙齒還硬確確仔，恁打爽拿來擲忒？「噢，這支蛀忒深了，無救。」醫生恁樣講，就算較捨佢毋得，乜愛擲。恁見笑，蛀牙也好講！唉，無講，您毋知人哪痛！後生人个牙倉肉大體較康健，一般都對牙齒面蛀往下，盲蛀到牙本質就一大空了，戇戇人也知好補。上歲个人，牙倉肉多多少少仔倒鉤，牙腳較顯，恬恬肅肅，佢就對側腩面蛀落去。該位个牙面薄薄仔，一蛀就假近牙根兩片个神經、血管，毋單淨閒時食燒食冷痠軟痛，發炎起來還會痛到人颯颯颯喊阿姆哀，醫生講「無救、無救」，吾心肝肚乜捨佢毋得還痛錢咧。

故所，恁兜每半年邊仔就好去分醫生檢查一到牙齒，一支支仔巡清楚，哪支有爭差著个就好遽遽救佢。洗牙齒，也做得摻閒時無搓淨个牙斑菌、牙結石清淨，正毋會變到牙周病。怕會摻牙齒洗壞忒？牙齒比骨頭較硬、洗牙機緊來緊進步，無恁戇會摻人个牙齒洗壞。醫生還講，多嚙粗食、少食忒幼秀个食品，牙齒、牙槽骨會較康健，較毋會壞到愛擲牙齒。牙齒係分人擲忒，就算搭牙橋、抑係種牙齒補倒轉去，還係會影響著牙倉肉、牙槽骨个穩固。

總講，恁兜平常時就愛好好保護自家个牙齒，牙齒種到較好，還係無自家原本个好。

作者：彭瑞珠

### ☆詞彙學習☆

【釘桶仔】dang' dun' e'：打樁。

【牙本質】nga' bun' ziid'：象牙質，牙本質。

【噠噠噠噠噠】da da da da da：噠噠聲，形容規律的機器聲響。

【颯颯颯颯】xiu' xiu' xiu xiu：原指風聲，這裡用來形容一陣陣牙痛的感覺。

【牙鉸】nga' gau：牙關。

【牙橋】nga' kieu'：牙橋。以缺牙的前後牙

【金哲哲】gim' xi xi：亮金金。

做支撐，做三至四顆相連的假牙。

### ☆文法學習☆

【捨牙齒毋得】sa' nga' cii' m' ded'：對牙齒難以割捨。「捨+N<sub>名詞</sub>+毋得」，表對N<sub>名詞</sub>難以割捨，捨不得與N<sub>名詞</sub>分離。

例1：佢捨錢毋得，較想食乜毋盼得買。（他對錢難以割捨，再怎麼想吃也捨不得買。）

例2：佢想出國讀書，毋過又捨阿母毋得。（他想出國念書，可是又捨不得與母親分離。）